



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Komunikadu Imprensa

23 Janeiro 2019

**Estudante Eskola Públiku Ekonomia no Komersiu Baucau primeira-ves simu
treinamentu kona-ba direitu labarik no sistema justisa formál**

Iha 18 Janeiro 2019, Judicial System Monitoring Programme (JSMP), realiza treinamentu iha Eskola Públiku Ekonomia no Komersiu Baucau kona-ba direitu labarik no asesu ba sistema justisa formal tuir instrumentu internasionál no lei nasional. Treinamentu ne'e partisipa hosi estudante hosi klasse 1, 2, 3 ho total partisipante hamutuk ema nain 30 kompostu hosi fetu na'in 20 no mane nain 10.

Treinamentu ne'e kobre asuntu sira kona-ba direitu labarik, asesu ba justisa formal, garante sira ba direitu labarik tuir lei internasionál partikularmente kona-ba Konvensaun Direitu Labarik no lei nasional ne'ebé fo protesaun ba direitu labarik nomós tipu krime sira ne'ebé constitui nu'udar krime hasoru labarik iha Timor-Leste no Lei Kontra Violénsia Doméstika.

Aleinde ne'e, JSMP mós loke filme kona-ba knaar sira autóridade judisiál nian hanesan knaar tribunál; ministériu públuk no knaar defensoria públuku.

“JSMP preokupa no sempre ezije atu ema hotu fó atensaun ba direitu labarik no oinsa atu proteze, promove labarik nia direitu sira ne'ebé konsagra iha Konstituisaun nomós lei internasionál sira ne'ebé Timor-Leste adopta ona. Ida-ne'e obriga ema hotu, familia, sosiedade no estadu atu tau matan ba labarik sira no sein halo diskriminasaun hasoru labarik”, dehan Diretór Ezekutivu JSMP, Luis de Oliveira Sampaio.

Durante treinamentu ne'e, partisipantes sira foti kestaun sira kona-ba infantisidiu ka kazu soe labarik ne'ebé ikus-ikus ne'e sempre akontese. Aliende ne'e sira mós kestiona kona-ba kazu abandona labarik ne'ebé rezultadu husi inan aman sira fahe malu, hola fali mane seluk ka fetu seluk.

Hatan ba perguntas no kestoens sira ne'ebé partisipante sira levanta durante treinamentu ne'e, iha relasaun kazu infantisidiu ka kazu soe labarik, JSMP esplika katak tuir artigu 31 Kódigu Penál ne'ebé tenke konsidera mane ne'ebé halo isin rua ba fetu hanesan mós autór, ne'e signifika katak bainhira akontese kazu infantisidiu labele hare deit ba arguida maibé persiza hare mos ba *co-autor* ema ne'ebé konvense, influensia no ho meus hotu hodi obriga arguida komete krime ne'e.

Iha relasaun ho kazu abandona JSMP klarifika katak Ministériu Públiku representa labarak nia direitu halo proseu ba tribunál kontra inan no aman hodi fo alimentasaun ba labarik. Tuir artigu 225 Kódigu Penál define kona-ba obrigasaun atu fó alimentasaun ba labarik ka ema ne'ebé prezisa hetan alimentasaan ka kondisaun relevante sira seluk atu satifas sira nia nesesidade. Tanba ne'e, mezmú karik inan aman fahe malu, maibé lei proteze labarik sira asesu ba alimentasaun liuhosi tribunál. Aleinde ne'e, posivelmente bele prosesa liuhosi prosesu sivil atu husu responsabilidade paternal bazeia ba artigu 1787 Kódigu Sivil.

Diretór eskola Sr. Deonizio Thomas Ximenes iha ninia abertura, expresa nia agradesementu ba JSMP nia prezensa tanba eskola sekundaria públiku no privadu barak iha Distritu Baucau no iha nivel sub-distritu maibé JSMP bele hili ami nia eskola hodi fahe informasaun kona-ba direitu labarik no asesu ba sistema justisa formal. Nia husu ba JSMP atu bele continua atividade hanesan kada tinan tanba durante ne'e eskola ne'e eziste seidauk organizasaun ruma ba fahe informasaun hanesan JSMP ba halo dadauk ne'e.

Iha enseramentu, Sr. Ximenes continua subliña ninia apresiasaun no agradesementu ba JSMP tanba durante loron ida bele fahe ona material espesfiku kona-ba direitu labarik no asesu ba sistema justisa formál ba estudante sira. Nia rekonese katak durante ne'e sira rona deit direitu labarik maibé la hetan informasaun natoon kona-ba oinsa atu proteze labarik tuir instrumentu legál sira ne'ebé Timor-Leste iha no adopta ona. Nia promete katak nia sei organiza estudante nain 30 ne'ebé simu ona informasaun ne'e hodi continua fahe informasaun ba estudante sira seluk ne'ebé la-konsege partisipa iha atividade ne'e.

Treinamentu ne'e realiza tanba apoiu finanseiru hosi Embaixada Canada, Jakarta-Indonézia.

Atu hetan informasaun liutan bele kontaktu ba:

Luis de Oliveira Sampaio

Diretór Ezekutivu JSMP

E-mail: luis@jsmp.tl

Telefone: 3323883 | 77295795